

四庫全書

子部

欽定四庫全書

子部

古今姓氏書辨證卷九至十二

詳校官中書臣沈鳳輝

侍讀臣孫球覆勘

謄錄監生臣吳壽康

謄錄監生臣張曾壇

欽定四庫全書

古今姓氏書辨證卷九

宋 鄧名世 撰

下平聲

一先

先

出自晉公族先氏世為晉卿大夫所謂欒卻狐先者也春秋時有先穀先都先辛皆以姓名見其尤顯者曰原大夫先軫生霍伯先且居且居生先克三世為

卿

阡

唐中和二年邛州牙官阡能因公事違期避杖亡命
為盜捕盜使楊遷誘之能自出首而遷誣以擒獲被
刑甚酷遂罵楊遷發憤為盜衆數千人十一月陳敬
瑄命高仁厚為招討使仁厚用謀者破平之邛州又
捕能叔父行令等敬瑄釋之

天

黃帝之相有天老後以為民元和姓纂曰莊子有天
根注云人姓名謹接近世解註莊子多寓言而天根
非人今依姓纂

賢

出姓苑

弦

出自古子爵小國在光州弋陽軟縣東南春秋魯僖
公五年楚滅弦弦子奔黃以國為氏齊有弦多衛有

弦施

案弦施亦齊臣此作衛蓋以哀公四年齊陳乞弦施衛甯跪救范氏遂悞以弦施為衛人

燕

出自姬姓周同姓大臣召公奭為武王成王太保封於北燕傳國四十二世至王喜為秦所滅當春秋初燕地小常為山戎所侵子孫出仕中國以國為氏或云南燕姑姓之後其國先亡因以為氏孔子弟子有燕伋字子思漢有宜城侯燕倉唐有直臣燕欽融元和姓纂曰弘農燕氏廣漢燕氏皆漢以來自范陽徙

居者唐百濟大臣八姓其一曰燕氏餘乃沙曷解真國苗木七氏也

田

出自媯姓陳厲公生公子完避禦寇之亂奔齊以國為陳氏齊桓公使為工正食采於田八世孫常擅齊政為強家始稱田氏或云陳田聲相近也常曾孫曰和始篡齊為諸侯和生午午生威王嬰齊又四世而

秦滅齊虜王建建弟假及儋

案王建弟惟假一人若儋市等皆齊王疎族此

作建弟假及僖未詳所本

僖子

市從弟榮弟橫僖子廣項羽時並

裂地稱王漢興諸田徙陽陵又徙北平太尉武安侯

蚡大鴻臚廣明大司農延年皆其後魏議郎疇字子

泰二十四世孫環

案唐世系表作二十二世

唐鄭州司馬生承嗣

案唐世系表環生守義守義生承嗣此缺

一代

其孫弘正為司徒中書令子

市魏博節度使又有望出平涼京兆鴈門太原天水

信都者世系具元

和姓纂

案姓纂今缺

又後漢益州掾田

恭能譯夷人語屯田長史田颺戰沒田汜逐敵被殺

晉有羅尚督護田佐後蜀尚書田褒西涼鎮軍將軍
西郡太守田昂昂兄子承愛南涼博士祭酒田元冲
後周賜鴈門公田弘姓紇干氏隋初復舊玄孫正幹
河南田氏壽安田瑜字資中龍圖閣直學士右諫
議大夫有傳生齊卿真卿漢卿彥卿輔卿福昌田晉
揚州刺史生供奉官謚謚生國子博士祐興祐興生
光祿卿棐有傳棐生陝州閭鄉簿伸 淄州田氏鄒
平田敏太子少傅致仕生殿中丞章太中大夫宗顯

宗顯生奉議郎綱及照綱生疇疇生文明字德普照
生迪功郎俊民俊民生延慶字祖洽並宣和六年進
士 范陽田氏京兆尹永興軍節度使贈侍中重進
有傳生六宅使守信供奉官閣門祇候守吉守信生
殿直保和保正 潁川汝陰田氏號州團練使令方
生郢州團練使欽祚有傳欽祚生供奉官閣門祇候
承誨崇儀副使承說承誨生閣門祇候紹忠 并州
太原田氏檢校太傅左驍衛上將軍景咸有傳生漢

明補供奉官使嶺表卒 易州田氏紀生成象成象

生後唐泰州牧行方行方生再遇再遇生敏字子俊

儀州防禦使有傳生瑾琳璫璋瑞瑾生文思副使守

度守度生楸楸生灝紹聖四年進士璫供奉官生內

殿崇班守琪內殿承制守中供奉官守畏守道守中

生澄城簿緊璋生角瑞生希古希道希崇 汾州田

氏左領軍衛大將軍康州團練使

案宋長興間有田紹斌汾州人累官

康州團練使此有傳生守信內殿崇班閤門祇候

脫名當即此人

兗州瑕丘田氏水部員外郎昭度生殿中丞穀穀生
太常博士植

顛

春秋晉大夫顛頤之後

牽

安平牽招為袁紹子尚從事降曹操曹操遣招詣柳
城慰撫烏桓其後操梟尚首令三軍敢有哭之者斬
招獨設祭悲哭操義之舉為茂材又祖約有將牽騰

淵

姓源韻譜曰出自高陽氏才子八人其一曰蒼舒謚
淵後以謚為氏

邊

出自子姓漢有邊韶字孝先南涼輔國司馬邊憲西
秦鎮遠長史邊芮五代江南將邊鎬其後子孫或居
楚丘或居陳留

縣

平聲

聖祖上一字嫌名其字與縣邑之縣字同而平聲或從心魯大夫有賁父及子瑣二人孔子弟子有賁字

子象

案孔子弟子縣廩父字子象見廣韻注廩索隱作豐家語無父字此作賁疑即廩字之訛又有

縣子成字子祺家語作子橫亦孔子弟子

今詳此本以垂掛為義而姓書

未有言其所自出竊意古者天子宫縣諸侯軒縣必有樂師掌其事者以世官為氏又古者男生必垂桑弧於門以射天地四方周官治象刑象之法必垂之象魏決日而斂之故莊子謂之縣令此二事亦恐有

因而得氏者然則賁父子瑣亶成芝點六人者其氏
宜音平聲無疑矣近世姓源韻譜元和姓纂皆以此
氏入去聲音黃練切誤也今改正入先韻去聲三十
三霰更不收

先穀

元和姓纂曰晉先穀之後氏焉謹案春秋先穀食原
彘二邑為卿故曰原穀又曰彘子

先賢

漢匈奴單于從兄曰逐王先賢揮降元帝時封歸德侯諡靖生陽侯富昌富昌子諷諷子襄襄子霸皆嗣師古曰揮音纏

千乘

謹案千乘邑名也其先食邑者因以為氏

涓濁

元和姓纂曰呂氏春秋夏首人涓濁梁善畏明失氣而卒謹案荀子濁作蜀或恐濁梁姓涓而非複姓

二仙

鮮

元和姓纂曰鮮于氏之後或單姓蜀李壽司空有鮮
思明

錢

出自顓帝曾孫陸終生彭祖彭祖生孫孚為周錢府
上士因官命氏焉戰國時有隱士錢丹秦御史錢產
居下邳西京雜記會稽人錢勑勞苦故人朱買臣遺

然

出自姬姓鄭穆公蘭十一子其一曰子然子然之孫丹字子革奔楚為右尹以王父字為氏

延

後漢有公孫述將延岑又有京兆尹延篤謹案吳公子札食采延陵及州來左傳稱延州來季子則已去陵稱延延氏宜出於此又後魏可地延氏亦改為延氏

連

元和姓纂曰齊大夫連稱後今泉州有連氏望出馮翊又河南連氏五代史福建偽閩門使連仲遇

偏

元和姓纂曰古有偏將軍急就章亦有偏姓即其先為偏將軍以官為氏

便

姓書云漢少府便樂成望出魯國誤矣謹案霍光傳

故長史任宣謂霍禹曰使樂成小家子也得幸大將軍至九卿封侯師古曰使姓也字或作史然則使史通用而姓書誤其字畫以使為便也

綿

元和姓纂曰晉大夫食采綿上子孫氏焉謹案孟子時有高唐人綿駒善歌者即其後又河南綿氏後魏官氏志爾綿氏改為綿氏

全

吳大司馬全琮居吳郡錢塘五代時蜀將全師都即其後又蜀賊取文州刺史全師雄為帥登州蓬萊全氏駕部郎中元忠生濤濤生化之化之生居易泉

本姓全氏全琮孫暉封南陽侯食封白水改為泉氏後魏巴人泉企為洛州刺史上洛侯故望出上洛

遼東泉氏唐高建武為高麗王時有蓋蘇文者姓泉氏自云生水中以惑眾父為東部大人對盧蓋蘇

文嗣立殘凶不逞弑其王建武更立建武弟之子藏
為王自為莫離支專國莫離支猶唐兵部尚書中書
令蓋蘇文死子男生代為莫離支與弟男建男產相
怨高宗平高麗授男產司宰少卿男生右衛大將軍
投男建黔州男生有傳

宣

風俗通曰宋宣公之後以諡為氏後漢馮翊雲陽人
宣秉字巨公為大司徒司直光武曰楚國二龔不如

雲陽宣巨公子彪官至玄菟太守又晉彭城令宣聘
望出陳郡元和姓纂曰魯叔孫宣伯之後誤矣宋宣
公舍其子與夷以國授其弟穆公君子謂之知人叔
孫宣伯以淫罪奔齊魯人盟之曰無或如叔孫僞如
欲廢國常蕩覆公室僞如不自安又自齊奔衛而子
孫無仕諸侯顯者其後必不為氏謹案漢功臣表南
安莊侯宣虎以重將破臧荼侯九百戶生共侯戎戎
子千秋以罪免元康四年虎曾孫南安簪褭護詔復

其家又土軍武侯宣義以廷尉擊陳豨侯千一百戶
生孝侯相如案漢書相如作莫如相如生康侯平平生侯生虎
義皆宋宣公後巨公之先也

翽

出姓苑

船

集韻曰人姓

顓

元和姓纂曰出自顓帝之後或顓臾之後以國為氏
欽

元和姓纂曰顓孫之字或作欽誤矣謹案此氏必魯
大夫欽孫之後欽孫乃生搏宋萬者

負

見上平聲宋陵州仁壽負安宇太子中允弟安興屯
田負外郎

虔

出自黃帝之子得姓者十四人其一曰虔氏

案國語胥臣曰

黃帝之子二十五宗其得姓者十四人為十二姓姬酉祁已滕箴任荀偃姁嫫依是也惟青陽與夷鼓同已姓又云青陽與蒼林為已

姓則十四人中並無虔氏風俗通曰望出陳留

騫

出自閔氏魯閔損字子騫為孔子弟子其孫文以王父字為氏後漢質帝時有騫宏字弘伯避地昆吾為金城別駕封金城侯子孫因家焉裔孫彊晉將軍平陽郡太守二子白昊白四世孫敬字宗之後魏奉朝

請金城郡守尚書庫部郎中一子成裔孫行本唐靈
州都督長史彊五世孫威後魏鄯州刺史隰城公曾
孫直唐華州長史生味道相武后味道生慎金辭玉
公胤

權

出自子姓商王武丁之裔孫封於權邑其地南郡當
陽縣權城是也楚武王滅權遷其國於那處子孫以
國為氏秦滅楚遷大姓於隴西而權氏始居天水漢

左輔都尉忠十四世孫翼字子良為前秦右僕射安
丘恭公生宣褒後秦黃門侍郎六世孫榮隋儀同郎
城公生文誕常州刺史平涼公生崇本曾孫德興唐
世系表曾孫作玄孫字載之相唐憲宗有傳元和姓纂以鬪緡
之後為權氏誤矣楚嘗使緡及閭敖尹權而皆叛未
嘗為氏又唐開元梓州刺史權若訥有集十卷

拳

春秋時衛大夫拳彌其先以地為氏

鄢

謹案春秋釋例鄢鄭地也其先以所食邑為氏楚鄢將師衛鄢武子盱皆為大夫姓書未有此氏今增入

媯

姓解曰漢有媯說誤矣漢弓高侯韓頽當孽孫曰媯為武帝嬖臣其弟說封按道侯乃二人名非人姓也

鮮于

出自子姓商父師箕子佯狂避紂為周武王陳洪範

武王封之朝鮮支子仲食采於于因合鮮于為氏唐
貞觀所定高陵郡五姓其一曰鮮于氏藝文志有鮮
于向集十卷後燕翟真司馬鮮于乞翟成司馬鮮于
得後趙將軍鮮于亮

延陵

出自姬姓吳王壽夢少子札食邑延陵後世以邑為
氏元和姓纂曰趙襄子有謀臣延陵正即其後謹案
宋謝晦兵敗而走左右皆棄之唯延陵蓋追隨不捨

文帝以蓋為鎮軍將軍

延州

元和姓纂曰吳季札封延州來因氏焉誤矣延延陵也與州來為二邑後世無以延州為氏者

宣于

姓苑曰前趙錄劉元海有太史令宣于修之

顓臾

出自風姓之後封為附庸國於濟水之上司伏羲太

皦祀者以國為氏

顓孫

風俗通陳公子顓孫仕魯因氏焉其孫顓孫師字子張為孔子弟子生申祥娶子游之女

顓頊

下字犯廟諱古高陽氏帝號後世以為氏神仙傳有太原女顓頊和

孿鞮

漢匈奴傳單于姓攣鞬氏師古曰攣力全反鞬丁奚反

焉耆

上音咽
下音支

西域人本焉耆部為國後以國姓

鮮陽

元和姓纂曰漢有揚州刺史鮮陽進其孫滔散騎常侍

鮮虞

出自春秋時鮮虞小國其地今中山是也晉伐鮮虞
滅之子孫以國為氏

欽定四庫全書

古今姓氏書辯證卷十 宋 鄧名世 撰

三蕭

蕭

出自子姓商王帝乙庶子微子啟周封為宋公弟仲
衍八世孫戴公生子衍字樂父裔孫大心平南宮長
萬有功封於蕭以為附庸今徐州蕭縣是也子孫因
以為氏其後楚滅蕭裔孫不疑為楚相春申君上客

世居豐沛漢有丞相鄼文終侯何三子祿貴則

案漢書何

子二人祿延廷生道及則則子慶此作何三子祿貴則則生彪未詳所本

則生彪字伯文

諫議大夫侍中以事始徙蘭陵生章公府掾童生仰

字惠高生皓皓生望之御史大夫徙杜陵生育光祿

大夫生紹御史中丞復還蘭陵生闔光祿勳闔生闔

濟陰太守闔生氷吳郡太守氷生苞後漢中山相生

周博士周生矯蛇丘長矯生遼州從事遼生休孝廩

休生豹廣陵郡丞豹生喬太中大夫生整字公齊晉

淮南令過江居南蘭陵武進之東城里三子雋鎔烈
苞九世孫卓字子略洮陽令女為宋高祖繼母號皇
舅房卓生源之字君流徐兗二州刺史襲封陽縣侯
生思話郢州都督封陽穆侯六子惠開惠明惠基惠
休惠朗惠禧惠齊尚書生介字茂鏡梁侍中介生
引字敬休陳吏部侍郎引生德言唐秘書少監德言
生沈太子洗馬沈生安節相王兵曹參軍安節生至
忠元嘉廣微至忠相中睿二宗生衡衍隨齊梁房整

第二子鎔濟陰太守生副子州治中從事生道賜宋
南臺治中侍御史三子尚之順之崇之順之宇文緯
齊丹陽尹臨湘懿侯十子懿敷衍暢憲宏偉秀懽懽
衍梁高祖武帝也號齊梁房懿字元達長沙宣武王
七子業藻象猷朗軌明明字靖通梁貞陽侯曾孫文
憬湖州司馬生元祚元禮元祚萍鄉侯生司勳員外
誠汝州刺史諒諒生給事中直直生策節革革邵州
刺史生嶰鄴嶰嶰字應之鄴字啟之相唐宣宗五子

晏字季平浣字文度昌字光祥黯字中蘊曉字象文
元禮湘州刺史生誠諡詮纂梁高祖武皇帝八子統
綱續繹綜績綸紀統昭明太子綱簡文帝統五子歡
譽譽整暨譽後梁宣帝生歸安嚴岑歸後梁明帝生
琮璟琢珣瑀琮隋莒國公璟祕書監琢晉陵王珣南
海王瑀字時文相唐高祖太宗珣生鉅鈞鉅生唐銀
州刺史嗣德鴻臚少卿瑯琊郡公嗣業鈞太子率更
令生灌字玄茂唐渝州長史灌生絳州刺史仲豫及

嵩嵩相明皇生華悟衡華相肅宗生殿中侍御史常
常生俛字思謙相穆宗悟大理司直生倣字思道相
僖宗倣生給事中廩字富侯廩生須益頰須生愿後
唐太子賓客益生灌廣南相入朝為屯田員外郎衡
太僕卿駙馬都尉生戡復巽升品復字履初相德宗
生儉湛儉生騫字鵬舉湛生寘寘寘相懿宗生邁邁
邁字得聖相僖宗邁字昌聖瑞生銳錯銳駙馬都
尉太常卿錯虞部郎中鉞給事中鉞生恕虢州刺史恕

生定字梅臣唐史稱蕭氏自瑀至邁八葉宰相以為
盛族謹按春秋左氏傳成王分魯公伯禽以商民六
族一曰蕭氏其後無聞 契丹蕭氏晉開運末耶律
德光北歸以蕭翰為宣武節度留守東京翰契丹呼
為國舅及將授節鉞李崧為製姓名曰蕭翰自是始
姓蕭而蕭氏女世為契丹后云

貂

齊寺人貂之後今望出渤海

案後漢書陽嘉四年初
聽中官得以養子為後

周時不應有此風俗
通引貂勃為近是

刁

姓書云刁貂聲同而字異本一姓也蜀有刁達後燕
有刁雲

凋

晉載記石遵有將軍凋成姓書未有此氏今增入
條

漢孝平時安城太守程君緡娶渤海條真女程祁作

姓氏譜云條氏商賢人之後是也

案左傳周分魯公
殷民六族有條氏

趙石虎有太常條枚為太子傅

調

周禮調人之職掌司萬民之難而和合之其世官者

氏焉

聊

風俗通有漢侍中聊倉著書號聊子又漢有潁川太

守聊謀著萬姓譜子孫因官為族望出潁川

遼

出姓苑又魏將軍牛金避司馬氏難嘗改姓遼氏至
後周工部尚書遼允始復為牛氏

堯

帝堯之後以謚為氏世居上黨長子後魏大司農堯
暄徙居岐州生宗宗兄子雄北齊驃騎將軍又隋鷹
揚郎將堯君素魏郡湯陰人

鄒

趙大夫食采於鄆因為氏今深州阜城即其地也

案史記孔子弟子有鄆子單字子家當即其後

四宵

蛸

出自蕭氏南齊武帝改巴東王子嚮氏曰蛸貶之使

同於蟲類也

朝

讀朝暮之朝

舊無此姓姓解曰紂臣有朝涉不勝其誤謹按邵意

以謂斮脛者朝姓而涉名豈知乃晨涉水者紂斮其脛見淫刑之甚不可謂之人姓名也今駁去

晁

出自史氏衛卿史朝之子曰文子荀荀子以王父字為氏朝通於晁故後世有晁氏或云蔡朝吳後亦作晁氏漢御史大夫錯即其後

朝

讀朝廷之朝

出自姬姓蔡仲裔孫曰文侯申生子朝子朝生聲子

公孫歸生字子家生吳以王父字為氏所謂蔡朝吳者

囂

虛嬌切

世本曰元囂之後

譙

舊姓書云出自姜姓武王克商下車封神農之後於譙以國為氏或云姬姓曹伯食采於譙皆誤矣謹按曹伯自文王子振鐸始封至伯陽而滅焦地未嘗在

其封內春秋時有二焦一在陳而近楚魯僖公二十五年楚成得臣取焦是也一在晉而近秦魯宣公二十五年楚師圍焦晉趙盾救焦是陳之焦宜為神農苗裔所封而晉之焦在河外乃召公奭子焦侯之舊國故晉司馬侯對平公曰虞虢焦滑霍揚韓魏皆姬姓也晉是以大武獻以下兼國多矣蓋自晉獻公時焦已在晉其後惠公重賂秦以求入許以河外列城五杜預以二城乃焦瑕三城闕後十五年鄭人燭之武說

秦伯曰許君焦瑕朝濟而夕設版焉又四十年當魯宣公二年則秦圍焦而楚滅之百餘年間在晉之焦三見于傳則姬姓焦侯之後明而可據如曰神農之後則又不可不辯也何以知之昔武王封黃帝之後於蓊封神農之後於焦雖有其事而實無受封之人考諸經史可驗者五事史記云炎帝失德黃帝與戰于阪泉之野滅之遂有天下則神農氏亡矣自黃帝及商更數千年不聞其後有達人一也初為杞侯者

曰東樓公初為宋公者曰微子初為陳侯者曰胡公
媯滿炎帝之後獨無姓名二也薊子地後入于召公
之北燕焦之地後入于陳足見無人可立國亦隨除
三也周初以杞為二王後又封陳以脩三恪三恪以
恭奉先聖為義蓋武王封建之法非帝王舊制也使
炎帝之後有人必增三恪以為四矣四也孔子謂武
王興滅國繼絕世天下之民歸心焉蓋下車之初凡
三皇五帝二王之後有國者存之滅者興之絕者繼

之此盛德之事也至求其後裔而不復可見蓋亦收其爵土改命賢者以為諸侯宛如後世褒錄古賢而不幸無後則已行之命當閤而不下史臣書其事以見前之詔令不為無恩而一旦追寢非獲已焉五也舉是五事則姜姓焦國本無其人姬姓焦侯正為得氏之始唐人李利涉載其說於盛氏譜中雖略而可采今參合援引以定著譙氏譜云謹按譙氏出自姬姓召康公奭輔周成王為西伯夫人姜氏出游池上

見二黑龍交歔然不樂遂有娠及生子有文在其手
曰盛因名而氏之年十有八封為譙侯其地譙國焦
縣是也後裔寢微至晉武公偁起曲沃并晉稍吞滅
諸鄰國始并焦而有其地子孫因以為譙氏亦作焦
譙焦一也魏有譙周晉梓潼太守譙登高涼將譙朗
及明折衝長史譙昶後涼呂纂將譙辯後蜀李壽聘
處士譙秀以為賓客

焦

解見譙氏

椒

元和姓纂曰楚大夫越椒之後子鳴誤也謹按春秋越椒者若敖之後而伍參之子伍舉謂之椒舉舉之子曰椒鳴是伍參之祖父有字椒者而舉以王父字為氏不然則椒邑以邑為氏特史失其傳非越椒之後有椒鳴也今宜曰出自伍氏伍參之子舉以王父字為椒氏

饒

出自六國時齊大夫食邑於饒者趙孝成王四年拔其邑以封其弟長安君齊之故臣以邑為氏姓苑曰臨川人漢有魯陽太守饒威因家焉又吳志襄陽饒助之後徙居永安謹按徐廣注史記曰饒屬北海又曰饒陽在河間然則北海之饒宜為得氏之始

徭

後漢岑彭傳更始遣將軍徭偉鎮淮陽注風俗通曰

東越王搖句踐之後其後以搖為姓

繇

後漢郅惲傳太守歐陽歛教曰西部督郵繇延天資忠正稟性公方云云注曰繇姓咎繇之後

鉞

音姚

其先姚姓避難去女從金潁川邾縣姚氏漢桂陽太守猛生衛尉安成侯期期二子葛陵侯丹建平侯統丹生舒舒生羽羽生蔡皆嗣侯謹按唐以前鉞字未

有音姚者漢李廣傳注曰刁斗形如銷師古曰銷即
銚也音姚今俗或呼銅銚玉篇亦曰銚溫器也弋昭
切自唐人作廣韻始音掉案廣韻原有餘昭徒弔兩切蓋方言音
變所致而今人沿習久誤不可復改因考安成侯之
氏詳著其說

姚

出自虞帝生於姚墟因以為姓春秋時鄭大夫姚句
耳姚般即其後初陳胡公滿封於陳裔孫敬仲奔齊

為陳氏又為田氏齊亡居魯至王莽封田豐為代睦
侯以奉舜祀豐子恢避莽亂過江居吳郡改姓為姚
五世孫敷復改姓姚居吳興武康敷生信吳選曹尚
書八世孫僧坦隋開府儀同三司北隆公二子察最
察隋太子內史舍人襲公生思廉左散騎常侍修文
館學士豐城康男生豫州司戶參軍澄符寶郎憺澄
字處平生璫璫璫字令璋相武后璫戶部尚書最蜀
王友生思聰至八世孫衮唐太僕主簿 陝郡姚氏

亦出自武康梁有征東將軍吳興郡公宣業生安
仁隋汾州刺史生祥隋懷州長史檢校函谷都尉祥生
懿字善意雋州都督文獻公生元景元之元素元景潭
州刺史元之名崇相武后中宗睿宗明皇世稱姚梁
公生鄧州刺史彝大理卿昇永陽太守弁元素宗
正少卿生楚州刺史弁通事舍人鄴陵令算孫九人
曾孫二十人四世孫七人五世孫五人彝生閭閻
閭閻昇生閭閻弁生閭閻生係侯閭生倍倫閭生

侑伍闢生偁偕閔生恃

案唐世系表恃作評

悟憺惇惕閑生恬

澄闡生恒協恂其顯者偁之子勉為諫議大夫元素

五孫三曾孫弁生潤州司戶參軍閑睢陽太守右金

吾將軍閑滂生闡論算生閑閑子秘書監合世所謂

姚武功者

搖

句踐之後東越王搖子孫以王父字為氏漢功臣表

有海陽侯搖無餘本越將以都尉擊項籍封千七百

戶謚齊侯

案漢書作齊信侯此脫一字

子哀侯昭襄生康侯建建

生襄侯省

案漢書功臣表襄侯省作哀侯省

六世孫不更未央生賢

爵關內侯世居餘杭

韶

出姓苑今開封有此姓望出太原

昭

出自芊姓楚昭王熊軫有復楚之大功子孫蕃衍以謚為氏與舊族屈景皆為楚大族戰國策有昭衍昭

過昭奚恤皆是大臣

招

謹案春秋陳侯之弟招殺陳世子偃師楚人討而執

之放之于越其後以王父字為氏

案通志晉步招之後以名為氏漢大

鴻臚
招猛

苗

出自芊姓楚若敖娶郢女生鬬伯比伯比生子文子

良子良為司馬生越椒字伯棼以罪誅其子賁曾奔

晉晉侯使食苗邑為大夫以苗為氏其地河內軹縣
南苗亭是也望出上黨者唐侍中太保韓國公晉卿
祖襲夔始居長子晉卿四世孫璘泗州防禦使靜江
統軍璘生延祿字世功南唐檢校司徒行右千牛將
軍五子全厚全瞻全節全乂全晦 宋上黨苗氏知
麟州京生授字受之殿前副都指揮使保康軍節度
使檢校司空有傳生履管軍節度使累典邊郡有
傳 潞州壺關苗氏後徙符離太常少卿植生奉

大夫正倫正倫生時中字子居左朝散大夫寶文閣
待制守戶部侍郎有傳 開封苗氏太師繼宗生武
功大夫允元允元生武功大夫仲淵仲淵生豐政和
五年進士 常州苗氏工部員外郎因生推官祐之
祐之生縣令兼兼生元喬宣和六年進士 建康苗
氏諒生忠恕忠恕生伯達伯達生昌言紹興十二年
進士又有光祿卿苗振國子博士苗象中如京使苗
忠

要

唐李懷光妹婿要廷珍守晉州以州降馬燧

喬

漢太尉玄五世孫勒後魏平原內史從孝文入關生
朗朗生達後周文帝命去木為喬氏義取高遠也今
望出太原達喬孫琳相德宗

橋

史記魯人有橋桃畜牧塞上馬牛千匹粟以萬鍾計

又梁國睢陽橋氏成帝時大鴻臚仁字季卿從同郡
戴德學著禮記章句四十九篇號橋君學五世孫基
廣陵太守生肅東萊太守肅生太尉玄字公祖晉有
蜀人橋贊以李雄謀告張淳

僑

僑極之後

昭涉

漢功臣表有平州共侯昭涉掉尾以擊臧荼功侯千

戶生戴侯種種生懷侯它人它人生孝侯馬童馬童
子昧失侯元康四年掉尾玄孫涪不更福詔復其家
昭武

唐西域康國後名康居國其王始居祁連北昭武城
為突厥所破南依葱嶺即其地有支庶分王曰安曰
曹曰石曰米曰何曰火尋曰戊地曰史世謂九姓皆
氏昭武顯慶時以阿濫為安息州以其王昭武殺為
刺史籛斤為木鹿州以其王昭武閉息為刺史以米

國為南謚州授其君昭武開拙為刺史何國為貴霜
州授其君昭武婆達地為刺史史國為佉沙州授其
君昭武失呵喝為刺史舊史云支庶皆以昭武為姓
示不忘本也

朝臣

元和姓纂曰日本國使臣朝臣真人長安中拜司膳
卿同正副使朝臣太父拜率更令同正朝臣姓也謹
按日本傳其王文武遣朝臣真人粟田獻方物朝臣

真人者猶唐尚書也開元初粟田復朝貢從諸儒授經詔四門助教趙元默即鴻臚寺為師其副朝臣仲滿慕華不肯去易姓名曰朝衡歷左補闕儀王友多所該識久乃還天寶十二載朝衡復入朝

僑陳如

南史婆利國王姓僑如自古未通中國梁天監中遣使朝獻僑陳如者本天竺婆羅門晉末為扶南國王其子闍黎邪跋遂以僑陳如為號因姓氏焉

欽定四庫全書

古今姓氏書辨證卷十一 宋 鄧名世 撰

五肴

洩

姓苑曰漢書洩孔車收葬主父偃時稱為長者誤矣
此洩人孔車非名孔車以洩為氏

巢

春秋時巢邑大夫牛臣亦或以巢為氏後世望出魯

國者王僧孺百家譜云河內苟超娶魯國巢正女又有巢猗著音釋三卷望出義興者宋中書舍人巢尚之玄孫公逸為唐尚藥奉御世傳醫術今稱為巢氏病源者

茅

出自姬姓周文公第三子茅叔封於其地高平昌邑縣西茅鄉是也子孫以國為氏後漢樂安太守茅容後居陳留及晉陵宋茅嵩後居廣陵

包

上黨包氏出自楚大夫包胥有乞師於秦存國之功
食邑於申謂之申包胥子孫徙居上黨 丹陽包氏
其先泰山鮑氏王莽時避難去魚為包

苞

出姓苑

庶

風俗通云秦皇將軍庶公之後後漢有庶祀魯有庶

歆

茅夷

元和姓纂曰邾大夫茅夷鴻之後見左傳謹按世無此氏而春秋時夷鴻姓茅氏謂之茅成子則後世子孫何至乃以茅夷為氏考之義理極無依據凡姓纂中誤引經傳增收入姓如罕夷者數十如茅夷者又數十皆當時門生討論者淺陋訛謬雜之以穿鑿臆說刊修官未嘗考按本書因而附列今舉凡以辯之

如此類者悉合駁正

六豪

高

高氏出自姜姓齊太公六世孫文公赤生公子高其
孫僖為齊上卿與管仲合諸侯有功威公命僖以王
父字為氏食采於盧謚曰敬仲世為上卿敬仲生莊
子虎虎生頃子頃子生宣子固固生厚厚生子麗麗
生止奔燕十世孫量為宋司城後入楚又十世孫洪

後漢渤海太守因居渤海脩縣洪四世孫襄字宣仁

太子太傅襄生承字文休國子祭酒東莞太守生延

字慶壽漢中太守延生納字孝本魏尚書郎納生達

字式遠吏部郎中江夏太守四子約義

按唐世系表義作文

隱

漢隱晉玄菟太守生慶北燕太子詹事司空三子展

敬泰展後魏黃門侍郎二子謙頤謙冀青二州中正

滄水康公二子祚祐字子集光祿大夫建康靈侯

二子和璧振和璧字僧壽後魏中書博士下博公生

顗字門賢輔國將軍延康惠公

案唐世系表作建康惠子

振生石

字安表

案唐世系表振二子長石安次表今作一人與表異

後魏安德太守生

隋萬年令衡衡生元道仲仁季輔季通季輔相唐太

宗泰北燕吏部尚書中書令二子韜湖湖後魏寧西

右將軍生謚侍御史謚生樹生及翻樹生生歡北齊

高祖神武皇帝世系在北齊書及北史翻字飛雀後

魏侍御中散孝宣公生岳字洪畧北齊太保清河昭

武王岳生勣字敬德隋洮州刺史樂安侯生宗儉字

士庶相唐太宗六子文敏質行真行審行知名

原闕一人

文敏字履行戶部尚書駙馬都尉生璇瑾質行主客

郎中真行左驍衛將軍生岐嶠峻殿中丞蒲州長

史生餘杭令迴迴生彪著作郎崇賢館學士生某

按彪

生吳及集此某字應即吳避宋諱

及集集太原少尹兼御史中丞生

允恭少逸元裕元裕字景珪初名允中吏部尚書渤

海縣男子璵字瑩之相唐懿宗以上出唐宰相世系

表及元和姓纂按姓纂及唐表載高氏事詳矣然猶

有小誤考之春秋高偃乃天子之命卿其得氏在威
公前非有合諸侯之功而後得氏也魯莊公九年齊
桓公入鮑叔薦管仲於公曰管夷吾治于高偃是偃
已為高氏矣十五年復會于鄆桓公始霸十六年盟
諸侯于幽二十七年又盟于幽三十年北伐山戎閔
公元年存魯難經書齊高子來盟僖公元年救邢遷
于夷儀又會諸侯于櫓二年救衛封之于楚丘又盟
宋及江黃于貫三年會于陽穀四年以諸侯之師侵

蔡伐楚責苞茅之貢盟屈完于召陵始大霸諸侯五
年以諸侯會王世子于首止七年盟于甯母八年盟
于洮九年盟于葵丘天子賜之胙十三年會于鹹十
五年盟于牡丘十六年桓公卒凡在位四十有二年
桓公之盟莫盛於召陵首止會莫盛於葵丘功莫盛
於救邢存衛存魯北伐山戎南伐楚定王世子而皆
在於即位十年之間則高偃之氏何與於有功乎又
管仲平戎于王辭上卿饗禮則曰臣賤有司也有天

子之二守國高在則高氏為命卿亦已久矣僖之前
已有高渠彌高克為鄭大夫則齊之高氏其先亦已
仕鄭非待僖而賜氏也又春秋高無咎之子弱以盧
叛高止字子容奔燕其子豎不得立齊人立恭仲之
曾孫鄫為高氏後鄫既立其宗有高發高偃高昭子
昭子名齕一名齕字子將為梁丘據家臣高無平奔
北燕皆見於昭定哀之世則鄫之後不為無人至孔
子弟子有高柴字子羔亦出定哀間孟子弟子有高

叟出六國時宜皆為高郵裔孫今以量為止十四世
孫而棄郵則世次有疑今辯其誤以見姓氏舊無全
書云漢公孫丞相故人高賀告人曰弘內厨五鼎外
膳一肴安可示天下弘曰寧逢惡賓毋逢故人又酷
吏傳涿大姓西高氏東高氏自郡吏以下皆畏避之
莫敢與牾咸曰寧負二十石無負豪大家師古曰兩
高氏各以所居東西為號者後漢京兆高恢字伯通
隱華陰山中與梁鴻善南陽逸人高鳳字文通見逸

民傳後周賜武陽高賓姓獨孤隋初復舊子穎曾觀

河南高氏後魏官氏志有婁氏

按後魏志有婁氏作是樓氏

改

高氏隋吏部侍郎高孝基名知人房元齡高士廉微
時皆為其所知

皐

後漢桓榮薦揚州從事皐弘字秦卿吳郡人家世衣
冠子徽司徒長史元和姓纂曰望出廣陵後漢梁鴻
夫婦依吳大家皐伯通居廡下伯通察其妻舉案齊

眉異之曰非凡人也乃舍之於家

勞

晉有三公渤海勞霸

按後漢有
郎邪勞丙

牢

古牢子之後漢有尚書僕射牢梁春秋時齊大夫牢

成前軍御

按此下疑
有脫文

又魏將軍牛金亦嘗避難改牢

氏

褒

出自姒姓夏禹之後為諸侯以國為氏其地梁州襄城是也又河南襄氏後魏官氏志代北達勃氏改焉宋有太子洗馬襄希儼

陶

姓書云出自陶唐氏之後以國為姓誤矣謹按風俗通曰氏於事者巫卜陶匠周成王分康叔以商民七族一曰陶氏即其後也後世望出丹陽晉太尉侃之祖父同始居焉同生丹吳揚武將軍柴桑侯遂居其

地生侃字士衡娶十五妻生二十三子

按陶侃傳士衡作士行二

十三子作十七子與此異

二子少亡二十子官至太守侃生負

外散騎岱

按陶潛傳祖茂武昌太守此言潛祖負外散騎岱亦異

岱生晉安城

太守逸逸生彭澤令贈光祿大夫潛潛生族人熙之

按晉書宋書陶潛傳俱不載其子然潛五子侯儼份佚佚見潛誠子書無熙之名潛生族人四字應有脫

誤

宋度支尚書熙之生梁邵陵內史測測生陳吏部

尚書旻旻生隋散騎常侍元安元安生陳夔州都督

尚書令金陵縣公琮琮生唐韶州始興令處寂滁江

二州刺史銳賀州錄事參軍文禎處寂生唐滕王府
陪戎副尉先期先期生光庭光庭生如草及江州刺
史祥如草生進金進金生淮南威毅第二十將茂麟
茂麟生左中衛將軍若思若思生左驍衛將軍鑑

桃

其先食邑桃丘氏焉或曰周官攻金之工有桃氏為
釁者以世官為氏後慕容熙幸臣桃仁北燕馮素弗
以秦趙勲臣子弟桃豹為右常侍

教

高陽氏別號大教其後有教氏唐有教穎進士第望

出魯國

曹

出自高陽之後陸終第六子安為曹姓裔孫曹挾周武王封之於邾其地魯國鄒縣是也十四代孫文公遷於繹至戰國時距挾凡三十九世而楚滅之封其君為鉅鹿侯漢相國平陽侯參生侍中窋後徙居杜

陵後漢扶風曹世叔娶同郡班彪女名昭字惠班生子成齊相關內侯成生子穀中散大夫昭壻之妹曰曹生孝女曹娥會稽上虞人父盱絃歌為巫祝溺死燉煌太守曹原缺益州太守曹謙金城西部都尉曹鳳唐河南曹氏確字剛中相懿宗世系在唐表或曰姬姓周文王子振鐸封為曹伯至伯陽為宋所滅子孫亦以國為氏魏太祖即其後也誤矣當伯陽未亡時已有曹氏則魏亦當為陸終之後特史臣失於稽

考因成傳會之文爾今望出譙國者漢丞相平陽侯
參始居沛國譙縣望出金鄉者唐御史中丞懷舜之
後出齊郡亭山縣者唐金部郎中長史之後出東海
者晉吏部尚書簡之後出陳留者晉陳留太守同之
後出清河者晉清河太守泓之後出鉅鹿者魏太尉
洪之後 宋真定靈壽曹氏同生業業生成德軍兵
馬使芸芸生彬字國華太師兼侍中樞密使贈中書
令濟陽武惠王加贈韓王有傳生璨璉珽瑋玘玘

琮璆字韜光殿前都指揮使河陽節度同中書門下
平章事贈中書令諡武懿有傳生儀仲儀字措臣耀
州觀察使知渭州有傳生內殿崇班詠閣門通事舍
人詒謂西京左藏庫副使諒左侍禁談詠生文思副
使明侍禁暖明生濟涇洛暖生淵詒生內殿承制昉
昉生湜泌謂生文思副使昕昕生演泐濬諒生奉職
昭談生評事暉昉昶仲東頭供奉官璉滑州都指揮
使無子珣娶秦王女昭宣使恩州團練使生右侍禁

倫及偕倫生內殿承制訥訥生侍禁諫偕字光道衛
州防禦使知河陽有傳生大理寺丞諤侍禁詒內殿
崇班謚詒生曦瑋字寶臣宣徽北院使簽書樞密院
彰武軍節度使贈侍中謚武穆有傳生禮賓使僖內
殿崇班侍供備庫副使僕僖生供備庫副使諒左
藏庫副使說內殿崇班諱誼諷諒生奉職曠侍禁盱
殿直覲內殿承制昉侍禁睽說生評事昧諷生評事
旻諱生奉禮郎杲昇誼生供奉官暉內殿崇班暉侍

禁映暄暉生決洞暄生沖洵侯生供備庫副使諮諮
生睥睨睥生濡珰左藏庫副使睭生殿直偁三班奉
職估文思使僅左藏庫副使備偁生左藏庫副使
諲諲生內殿承制旣供奉官睭侍禁曷奉禮郎易睭
生淑沔湘測漑僅生左侍禁諤殿直證內殿承制詔
諤生侍禁皎殿直譜詔生曠奉禮眈備生大理評事
簪偁生內殿承制誨殿直論玘虞部貲外郎贈太師
尚書令兼中書令吳王生傳佾億女為慈聖光獻皇

后傳四方館使榮州刺史生供備庫副使誦誦生大
理評事景侑字伯容保靜保平軍節度使守太保贈
太師沂王有傳生皇城副使評東頭供奉官誠六宅
副使諭文思副使詳皇城副使諶東上閣門誘誠生
侍禁員昉昇奉禮郎昱供奉官晟億萊州防禦使生
內殿崇班讀皇城副使誌誌生昂晟珣東上閣門使
儀州刺史有傳生文思副使傑左藏副使依東頭供
奉官俊文思副使仇傑生三班奉職誥依生侍禁譜

俊生供奉官諛譏侂生供奉官計殿直讚計生時琮
為侍衛親軍馬步軍都指揮使有傳生皇城使嘉州
刺史脩西京左藏庫使任六宅副使侂左藏庫使偃
六宅副使伉左班殿直備脩生供奉官誠侍禁誚內
殿承制諫供奉官侍禁訐殿直譔諫生昱旦訪生暄
曠任生侍禁診奉禮郎訖侍禁譬供奉官諺殿直調
諺生渙

毛

漢有畫工毛延壽晉巴西郡丞毛植唐時滎陽河陽
北地毛氏世系皆具元和姓纂按姓纂毛氏今缺延壽畫人
形醜好老少必得其真

陶丘

元和姓纂曰帝堯子居陶丘因氏焉齊大夫陶丘德
漢侍御史陶丘仁後漢陶丘子林生魏安定太守壹
壹生晉陳留太守達江左有陶丘乂之漢末有平原
陶丘隆舉劉岱劉繇者

陶叔

出自周成王子陶叔之後以國及王父字為氏

曹牟

姓解曰先賢傳有兗州刺史曹牟君卿平昌人

曹丘

元和姓纂曰漢季布傳有曹丘生謹按曹丘生轅固生皆以諸生顯名故姓名之下稱生傳曰季布之名曹丘揚之也然則曹丘本非複姓林氏誤矣

饗饗

南史梁武陵王紀舉兵敗有司請絕屬籍元帝賜姓

饗饗氏

阜落

出自隗姓赤狄別種居東山者以國為氏

欽定四庫全書

古今姓氏書辨證卷十二 宋 鄧名世 撰

七歌

柯

齊西陵王典籤

按齊書柯益孫齊郡人
官典籤疑此有脫文

柯氏今望出

齊郡又後魏柯祗改為河南柯氏

多

謹按漢功臣表多軍故東越將漢兵至棄軍降武帝

元封元年封無錫侯千戶薨子卯嗣侯延平四年坐
與歸義趙文王將兵追反虜到弘農擅棄兵還贖罪
免李奇注兩粵傳及漢書音義皆曰多軍名也且粵
姓騶氏則多軍宜姓騶然其子卯不以姓著則必以
多為氏矣近世臨川有瘍醫能攻治傷折者皆多氏
而不知其所自出若非無錫侯卯之裔必多于多蘭
之類有單為多氏者今闕之以傳疑唐抵丘郡六姓
一曰多

佗

漢游俠傳東道佗羽公子注曰姓佗名羽字公子

羅

春秋時楚莫敖屈瑕伐羅羅人乘其無備與盧戎夾

攻之屈瑕不能克其後楚復伐羅并其國子孫以為

氏或曰出自妘姓祝融之後蓋其遠裔也

按世本夏有武羅其

後氏焉周官大羅氏掌鳥獸其後亦以為氏又急就篇羅氏顓頊後封於羅子孫以為氏左傳注羅熊姓

一曰祝融之後妘姓羅國為楚所滅其後號羅侯氏

元和姓纂有齊郡襄陽河

東三族後漢蜀人羅橫應募殺羌呂叔都封侯晉益
州刺史尚蜀李特將準益州牙門將羅特李離部將
羅義畧陽羅恒為李壽征東長史壽僭立用為股肱
南秦鎮軍將軍羅敷唐益州蜀郡三姓洪州豫州六
姓皆其一也天祐中起居郎羅衮字子制有集二卷
羅浩原羅鄴皆有詩一卷襄陽羅氏隋監門將軍
榮徙京兆之雲陽生藝字子廷唐開府儀同三司燕
王弟壽監門將軍杭州錢塘羅氏給事中隱為錢

氏幕客有詩名號江東集 江南羅氏後魏官氏志
代北斛瑟羅氏吐羅氏並改焉五代時有玉笥山道士
隱之與鄭雲叟同時者河南令貫以諫莊宗知名者
東川將璋事顏暉者

那

風俗通曰朝那東夷也以國為氏其後單為那氏燕
有遼西太守那頡

何

出自姬姓唐叔十一世孫萬食采韓原遂為韓氏後
為秦所滅子孫散居陳楚江淮間以韓與何近隨聲
變為何氏前漢司空何武後漢大將軍何進及何敞
晉外戚何晏皆有傳元和姓纂曰望出廬江丹陽東
海齊郡

阿

風俗通曰伊尹為阿衡子孫以官為氏 河南阿氏
官氏志阿伏氏阿賀氏並改為阿氏唐明皇時朔方

節度使阿布思乃九姓首領姓阿名布思

柯祇

祇一作枝

後魏官氏志代北有柯祇氏後改為柯氏

多蘭

代北多蘭部大人因以為氏

羅侯

羅君之後支孫氏焉晉中山王司馬服記蜀郡有羅侯氏北史代人羅結其先世領部落為魏附臣結為

外都大官總三十六曹事年一百一十詔聽歸老賜
大甯東川為私第別業并築城號曰羅侯城朝廷每
有大事驛馬詢問焉年一百二十卒

何奈

匈奴單于之裔歸漢為何奈氏晉幽州牧王浚有將

軍何奈虎

荷訾

代北人姓

阿跌

唐回鶻九姓一曰阿跌亦曰阿唃或為趺跌與拔野古等皆朝以其地為雞田州開元中趺跌思泰自突厥默啜所來降其後光進光顏以功臣至大官賜姓李氏

阿熱

唐回鶻傳點戛斯古堅昆國也自言李陵之後其君曰阿熱遂姓阿熱氏駐牙青山自阿熱牙至回鶻所

索馳四十日行譯者曰熱猶中國所謂郎也

阿每

唐日本國王姓舊唐史曰倭王姓阿每

阿那

後魏丞相阿那肱本姓高阿那時人便呼止曰阿那

阿賀

後魏阿賀氏亦改為阿氏

阿伏

後魏阿伏氏改為阿氏

佗駱拔

後魏官氏志改為駱氏

多覽葛

唐史回鶻九姓一曰多覽葛亦曰多濫在薛延陀東
延陀已滅其酋多濫葛末與回紇皆入朝以其地為
燕都督府授末都督末死以多濫葛塞匭繼為都督
今詳此正以部族為氏

阿伏干

後魏官氏志阿伏干氏後改為干氏

阿鹿桓

後魏阿鹿桓氏後改為桓氏

阿史那

突厥別姓唐太宗時有蕃將阿史那社尒高昌國亦
有大冠軍阿史那矩高宗時有大將軍阿史那道真
阿史那忠突厥亦有偽可汗阿史那倭子

阿史德

代北人姓唐有行軍總管阿史德樞賓執契丹松漠
都督阿卜固獻東樞賓貞觀五年為定襄都督秦涇
道行軍總管以討奚者又安祿山母阿史德

阿逸多

西域人姓

阿鹿孤

後魏改為鹿氏

八戈

戈

姓苑不載所出按夏后時戈本諸侯之國必其後以

國為氏

過

平聲

風俗通漢有兗州刺史過羽謹按春秋寒浞處其子澆于過謂之過澆少康滅之以封諸侯其地漢東萊掖縣北過鄉是也

繁音婆

周成王以商民七族分康叔一曰繁氏其後有繁羽
仕晉為大夫漢有御史大夫繁延壽後漢建武十八
年益州太守繁勝與昆明夷戰敗漢魏間有繁欽文
集十卷又汴州人繁氏世居梁孝王吹臺之側其家
富盛人謂吹臺為繁臺今東都天清寺即其地也唐
秣歸人繁知一題巫山廟詩為白樂天所賞

番

音婆

漢吳芮初封番君其支孫氏焉

和

出自羲和掌天地之官堯時和仲和叔之後以世官
為氏左傳晉大夫和組父

禾

謹按列子范氏之上客有禾生則禾為人氏矣姓書
未有此氏今增入

科

出姓苑

磨離

唐吐蕃將尚婢婢遣磨離罷子將兵拒論恐熱其屬
燭盧鞏力勸罷子按兵拒險罷子不從而敗

波斯

唐西域傳云其先波斯匿王有月支之別裔因以其
姓為國號

婆行

傅餘顧複姓錄曰代北人南涼尚書左丞婆衍嶠

和拔

代北人姓

和稽

代北人姓

九麻

車

尺奢切

本姓田氏其先齊諸田徙長陵

蛇

後秦姚萇有皇后蛇氏兄蛇越

按通志作蛇越滂

為南安太

守弟揚奇為散騎常侍又有建義將軍蛇立臨晉太守蛇平其後望出南安

瓜

出姓苑

花

唐高宗調露元年遣左領衛將軍花大智討突厥兵

敗免官舊唐史韓建誘防城卒花重武告十六宅反
宋有虞部郎中花尹望出東平

家

周大夫家伯為周幽王太宰又家父為大夫漢成帝
時家君作彈碁以獻天子賜羔裘紫絲履服以朝觀

瑕

出自周大夫食邑於瑕因以為氏望出汝南

巴

謹按世本曰巴郡南郡蠻本有五姓巴氏樊氏暉氏
相氏鄭氏皆出於武落鍾離山其山有赤黑二穴巴
氏之子生於赤穴四姓之子皆生黑穴未有君長俱
事鬼神乃共擲劍於石穴約能中者奉以為君巴氏
子務相乃獨中之衆皆服又令各乘土船約能浮者
當以為君餘姓悉沉唯務相獨浮因共立之是為廩
君乃乘土船從夷水至監陽監水有神女謂廩君曰
此地廣大魚鹽所出願留共居廩君不許監神暮即

來宿旦即化為蟲與諸蟲羣飛開掩日光天地晦冥
積十餘日廩君伺其便因射殺之天乃開明廩君於
是乎君于夷城四姓皆臣之後漢南蠻傳曰廩君死
魂魄世為白虎巴氏以虎飲人血遂以人祠焉秦惠
王并巴中以巴氏為蠻夷君長世尚秦女舊姓書云
出於春秋時巴子之後誤矣

沙

姓苑云東莞人風俗通晉有沙廣又唐百濟大臣八

族一曰沙氏梁貞明中有渤海沙永贊登第近世吳興多此姓

牙

風俗通曰周穆王太司徒君牙後以字為氏

衙

出自嬴姓秦穆公子食采於衙亦謂之彭衙因氏焉其地漢馮翊衙縣是也漢長平令衙卿七世同居蜀督護衙博姓書或音訝或音語大抵當以平聲為正

茶

舊音側加反漢江都易王弟濮陽侯定國行錢使男
子茶悟告王事蘇林曰茶音食邪反

余

視遮切

元和姓纂曰今洪州有余氏宋宣和間有奉議郎知
撫州臨川縣事余昌明

杞

蒲巴切

本姓杞東樓公之後也後漢靈帝時杞注避董卓難

改為杞氏元和姓纂又以杞為抱未知孰是

查

側加反

宋欽州休寧人查元方為殿中侍御史生道字湛然
嘗泣禱河而冰泮得魚饋母仕至龍圖閣待制

攄

與查同

車非

後魏獻帝次兄為車非氏孝文改為周氏周閔帝時

賜周瑤姓為車非氏

車焜

後魏獻帝封其疎屬為車焜氏後改為河南車氏

車遽

世本曰齊有臨淄大夫車遽氏

車成

出後魏河南官氏志

瑕呂

左傳晉大夫呂甥一曰瑕呂飴甥杜注云瑕呂名飴甥

沙陀

本朱邪氏所處磧名因為部族之號朱邪賜姓李氏而沙陀未嘗為姓元和姓纂以何據收之此必誤也

沙陀

唐有蕃將沙陀利沙陀忠利

余丘

其先齊公族食采余丘因氏焉漢有侍御史余丘炳
又隱士余丘靈居西河余音蛇

蛇丘

王子年拾遺記有蛇丘氏出西王母神異傳

華原

元和姓纂曰後周鳳州刺史拓義華原罷生威周豐
利公生韓皇右四府驃騎將軍生善惠

霞露

出姓解

瑕丘

風俗通魯桓公庶子食采瑕丘子孫氏焉謹按漢項羽紀傳有瑕丘申陽者張耳嬖臣也先下河南郡迎羽河上故羽立申陽為河南王孟康曰瑕丘縣之老人姓申名陽服虔曰瑕丘屬中山縣申姓陽名獨文穎曰姓瑕丘字申陽然則姓書用文穎之說創立此氏未必非誤又瑕丘於春秋時未必在魯而桓公之

後自為三家不聞庶子為誰也

